

# Wethulwe ngelikhulu isasasa umkhankaso wokulwisana nokuhlukunyezwa kwabantu besifazane kanye nabantwana

## SINDISWA ZIKHALI

Umphathiswa wezokuThutha, ukuPhepha nokuXhumanisa uMphakathi, uMnuz. Mxolisi Kaunda, ehambisana noDistrict Champion uMphathiswa wezeZindlu kanye nokuHlaliswa Kwabantu, Umnuz. Ravi Pillay, bathule ngelikhulu isasasa umkhankaso wokulwisana nokuhlukunyezwa kwabantu besifazane kanye nezingane. Lo mkhankaso uthulwe endaweni yase-Kilmun ngase-Underberg. Ngaphansi kukaMasipala i-Dr Nkosazane Dlamini Zuma.

Ukuthulwa kwalomkhankaso bekuhambisana nokuthulwa kwezinhlaka zomphakathi ezilwisana nobugebengu ama-Community Safety Structures akuyo lendawo. Lo mcimbi ulandela izigameko esenziwayelo zokuganiswa ngenkani kwabantwana abasafunda isikole, ukukhulelwa kwezingane, ukusetshenziswa kwezidakamizwa kanye nokuhlukunyezwa kwabantu besifazane. UMnyango wezokuPhepha nokuXhumanisa uMphakathi usebenzisana neminye iminyango bake baba nezinhlelo bengenelela ezinkingeni

zakulendawo. USihlalo wamaKhosi esiFundazweni, iNkosi Phathisizwe Chiliza, ugxeke kakhulu ukuganiswa ngenkani kwezingane zamantombazane ezisafunda isikole, wathi abazali abayeke ukuthi loku kulusiko ngoba umkhuba. "Kwasendulo asikaze sikubone loku esikubona namhlanje. Intombi ayikaze iyiswe lapho ingathandi khona. Yebo yayifika isifika nezinsizwa kodwa yiyo eyayisuke ikhombe indlela. Futhi akukaze kuthathwe ingane esafunda isikole iyoganiswa.

Thina njengobukhosi bakulendawo sizimisele ukuthi labo abayotholakala benze lomkhuba mhla bevela enkantolo sibe khona ukuyophikisana nesiselo sabo sebheyili", kusho uChiliza.

Umphathiswa wezeZindlu kanye nokuHlaliswa kwabantu, uMnuz. Ravi Pillay, uthe lesi sikhathi sezinsuku esi-16, isikhathi lapho sibuyisa khona ubuntu kanye nesithunzi sabantu besifazane.

Kuwumsebenzi wethu sonke njengabantu besilisa ukubanakekela nokubavikela hhayi ngalesi sikhathi kuphela kodwa ngaso sonke isikhathi. Uphinde wathi indoda engakwazi ukuvikela

abantu besifazane akuyona indoda leyo. Umphathiswa wezokuThutha, ukuPhepha nokuXhumanisa uMphakathi, uMnuz. Mxolisi Kaunda, ugxeke kakhulu abantu besilisa abahlukumeza abantu besifazane kanye nabantwana, wathi lo mkhuba awuphele nya.

Indoda ehlukumeza abantu besifazane kanye nabantwana ayiyona indoda eqotho.

Esethula izinhlaka zomphakathi uKaunda uthe, ukuzinikela kwalabantu ukulwisana nobugebengu kuyoba ubufakazi ngelinye ilanga ukuthi ukusukuma komphakathi usebenzisane namaphoyisa ukulwisana nobugebengu, ubugebengu bungaphela.

Umphakathi okumele uvale imakethe yamasela ngokungathengi impahla eyebiwe.

*UDISTRICT Champion waMasipala i-Harry Gwala, ophinde abe uMphathiswa wezeZindlu kanye nokuHlaliswa kwaBantu, uMnuz. Ravi Pillay, ethula inkulumbo yakhe emcimbini wokugutshwa kwezinsuku eziyi-16 zokulwisana nokuhlukunyezwa kwabantu besifazane kanye nokuthulwa kwezinhlaka zokuphepha.*



*KUSUKA kwesokudla, uMphathiswa wezokuThutha, ukuPhepha nokuXhumanisa uMphakathi, uMnuz. Mxolisi Kaunda, phakathi, uSihlalo wezinhlaka zomphakathi i-KZNCCPA uMnuz. Tallman Zuma, Kwesokunxele, uSihlalo we-CPF, uMnuz. Vukani Msomi.*

